

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona" broj 7/10), na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona na 166. sjednici održanoj dana 27.05.2014. godine d o n o s i

## ZAKLJUČAK

### I.

Utvrđuje se prijedlog Odluke o osnivanju Javne ustanove Centar za djecu i odrasle osobe s posebnim potrebama Zeničko-dobojskog kantona.

### II.

Prijedlog Odluke iz tačke I. ovog zaključka upućuje se u skupštinsku proceduru.

### III.

Zaključak stupa na snagu danom donošenja.

Broj: 02-\_\_\_\_\_ /14.

Datum, 27.05.2014. godine

Z e n i c a

**PREMIJER**

*Munib Husejnagić, dipl.ing.maš.*

DOSTAVLJENO:

1x Stručna služba Skupštine,

1x Ministarstvo za rad, socijalnu politiku i izbjeglice,

1x a/a.

Na osnovu člana 37. stav (1) tačka f) Ustava Zeničko-dobojskog kantona, u vezi sa članom 6. Zakona o ustanovama („Sl. list R BiH“, broj: 6/92, 8/93 i 13/94) i članom 73. stav (5) tačka b) alineja 3) i tačka e) Zakona o socijalnoj zaštiti, zaštiti civilnih žrtava rata i zaštiti porodice sa djecom („Sl. novine Zeničko-dobojskog kantona“, br. 13/07 i 13/11), Skupština Zeničko-dobojskog kantona na \_\_ sjednici održanoj dana \_\_.\_\_.2014. godine, d o n o s i

## **O D L U K U**

### **O OSNIVANJU JAVNE USTANOVE CENTAR ZA DJECU I ODRASLE OSOBE S POSEBNIM POTREBAMA ZENIČKO-DOBOJSKOG KANTONA**

#### **DIO PRVI - OPĆE ODREDBE**

##### **Član 1. (Predmet)**

Ovom odlukom Skupština Zeničko-dobojskog kantona osniva Javnu ustanovu Centar za djecu i odrasle osobe s posebnim potrebama Zeničko-dobojskog kantona (u daljem tekstu: Ustanova).

##### **Član 2. (Sadržaj osnivačkog akta)**

Odlukom o osnivanju uređuje se:

- a) naziv osnivača,
- b) naziv i sjedište ustanove,
- c) djelatnost,
- d) sredstva za osnivanje i početak rada ustanove,
- e) međusobna prava i obaveze između osnivača i ustanove,
- f) prava, obaveze i odgovornost u pravnom prometu,
- g) imenovanje organa upravljanja, rukovođenja i kontrole poslovanja,
- h) donošenje statuta,
- i) druga pitanja od značaja za rad ustanove.

#### **DIO DRUGI – NAZIV I SJEDIŠTE**

##### **Član 3. (Naziv javne ustanove)**

(1) Ustanova posluje pod nazivom Javna ustanova Centar za djecu i odrasle osobe s posebnim potrebama Zeničko-dobojskog kantona.

(2) Skraćeni naziv Javne ustanove je: Centar za osobe s posebnim potrebama.

**Član 4.**  
**(Sjedište)**

Sjedište Ustanove je u Zenici, u ulici Saliha Cakana Mulalića br. 5.

**Član 5.**  
**(Pravni status)**

- (1) Ustanova stiče svojstvo pravnog lica danom upisa u sudski registar.
- (2) Ustanova ima pečat i štambilj, čiji se oblik i sadržina utvrđuju Statutom.
- (3) Ustanova može imati poslovne jedinice, koje će biti osnovane s ciljem obavljanja registrovane djelatnosti Ustanove na području Zeničko – dobojskog kantona.
- (4) Odluku o osnivanju poslovnih jedinica donosi Upravni odbor Ustanove uz saglasnost Vlade Zeničko – dobojskog kantona.

**DIO TREĆI – OSNIVAČ, DJELATNOST I CILJEVI**

**Član 6.**  
**(Osnivač)**

Osnivač Ustanove je Zeničko-dobojski kanton (u daljem tekstu: Osnivač).

**Član 7.**  
**(Djelatnost)**

Djelatnost Ustanove prema Odluci o klasifikaciji djelatnosti Bosne i Hercegovine („Sl.glasnik BiH“, broj 47/10), je:

- 88.91 – djelatnost dnevne brige o djeci,
- 88.99 – ostale djelatnosti socijalne zaštite bez smještaja,
- 88.10 – djelatnosti socijalne zaštite bez smještaja za starije osobe i osobe sa invaliditetom,
- 86.90 – ostale djelatnosti zdravstvene zaštite,
- 85.59 – ostalo obrazovanje i poučavanje,
- 87.90 – ostale djelatnosti socijalne zaštite u ustanovama sa smještajem.

**Član 8.**  
**(Ciljevi i zadaci)**

Ciljevi i zadaci radi kojih se osniva Ustanova su:

- rano podsticanje razvoja i rana intervencija za djecu s posebnim potrebama predškolskog uzrasta,
- odgojno-obrazovni rad sa djecom i odraslim osobama s posebnim potrebama sa područja općina Zeničko–dobojskog kantona, s ciljem izgradnje ličnog identiteta, socijalne integracije, izgradnje kompetencija od životnog značaja, pripreme za život, a prema prilagođenom individualnom planu i programu,
- (re)habilitacija i podsticaj djece i mladih osoba sa posebnim potrebama kroz individualne i grupne rehabilitacijske i podsticajne mjere,
- dnevno zbrinjavanje djece i odraslih osoba sa posebnim potrebama,

- radno osposobljavanje i rehabilitacija odraslih osoba sa posebnim potrebama sa područja općina Kantona,
- program podrške porodici kroz neposredni savjetodavni i edukacijski stručni rad.

## **DIO ČETVRTI- SREDSTVA**

### **Član 9. (Sredstva za osnivanje i rad)**

(1) Osnovni kapital Ustanove u visini od 49.250,00KM (četrdesetdevetstijadadvjesto pedeset KM) osigurat će se iz Budžeta Zeničko-dobojskog kantona.

(2) Sredstva za rad Ustanove obezbjeđuju se iz Budžeta Osnivača i po osnovu ugovora sa općinama o učešću u pokriću dijela ili ukupnih troškova usluga Ustanove, te drugih izvora.

### **Član 10. (Raspodaganje prihoda i rashoda)**

Višak prihoda nad rashodima Ustanove, uz saglasnost Osnivača, koristi se za obavljanje i razvoj djelatnosti zbog koje je osnovana.

## **DIO PETI – PRAVA, OBAVEZE I ODGOVORNOSTI U PRAVNOM PROMETU**

### **Član 11. (Prava, obaveze i odgovornost Ustanove)**

(1) U pravnom prometu sa trećim licem Ustanova zaključuje ugovore i vrši druge pravne poslove u okviru registrovane djelatnosti.

(2) Za preuzete obaveze u pravnom prometu Ustanova odgovara sredstvima i imovinom kojom raspolaže.

### **Član 12. (Odgovornost Osnivača)**

Osnivač je supsidijarno odgovoran za obaveze Ustanove, koje su nastale kao rezultat rada u okviru registrovane djelatnosti.

## **DIO ŠESTI – ORGANI I OPĆI AKTI JAVNE USTANOVE**

### **Član 13. (Organi)**

Organi Ustanove su:

1. Upravni odbor,
2. Nadzorni odbor i
3. Direktor.

## **Član 14.** **(Upravljanje )**

- (1) Organ upravljanja Ustanove je Upravni odbor.
- (2) Upravni odbor ima pet članova, koji se biraju sa liste prijavljenih kandidata na javni oglas i čine ga predstavnici Osnivača – dva člana, zaposlenik Ustanove - jedan član, zaposlenik JU Centra za socijalni rad/nadležne općinske službe za socijalnu zaštitu sa područja Zeničko – dobojskog kantona - jedan član, te predstavnik iz reda roditelja/staratelja djece ili odraslih osoba s posebnim potrebama – jedan član.
- (3) Predsjednika i članove upravnog odbora imenuje Vlada Zeničko-dobojskog kantona (u daljem tekstu: Vlada) na period od četiri (4) godine i mogu biti imenovani najviše dva puta uzastopno.

## **Član 15.** **(Djelokrug rada Upravnog odbora)**

Upravni odbor donosi Statut Ustanove, imenuje i razrješava direktora uz saglasnost Vlade, utvrđuje planove rada i razvoja, utvrđuje godišnji program rada, donosi finansijski plan i usvaja godišnji obračun, donosi opći akt o unutrašnjoj organizaciji i sistematizaciji poslova uz saglasnost Vlade, donosi druge opće akte u skladu sa zakonom i Statutom Ustanove, odlučuje o svim pitanjima obavljanja djelatnosti radi kojih je javna ustanova osnovana, usmjerava, kontroliše i ocjenjuje rad direktora, rješava sva pitanja odnosa sa osnivačem, odlučuje o korištenju sredstava preko iznosa utvrđenog pravilima javne ustanove, osnivaču najmanje jedanput godišnje podnosi izvještaj o poslovanju Ustanove, vrši i druge poslove, u skladu sa zakonom i Statutom Ustanove.

## **Član 16.** **(Kontrola poslovanja)**

- (1) Organ kontrole poslovanja Ustanove je Nadzorni odbor.
- (2) Nadzorni odbor ima tri člana, koji se biraju sa liste prijavljenih kandidata na javni oglas i čini ga predstavnik zaposlenih Ustanove - jedan član, i sa liste ostalih prijavljenih kandidata na javni oglas - dva člana.
- (3) Predsjednika i članove Nadzornog odbora imenuje Vlada.
- (4) Nadzorni odbor obavlja poslove i zadatke u skladu sa zakonom i Statutom Ustanove.

## **Član 17.** **(Rukovođenje)**

- (1) Direktor je organ rukovođenja Ustanove.
- (2) Ustanova predstavlja i zastupa direktor bez ograničenja ovlaštenja, a u okviru registrovane djelatnosti i u skladu sa zakonom i Statutom Ustanove.
- (3) Direktora Ustanove imenuje Upravni odbor na osnovu javnog konkursa, uz saglasnost Vlade na period od četiri (4) godine i može biti imenovan najviše dva puta uzastopno.
- (4) Direktor obavlja poslove i zadatke u skladu sa zakonom i Statutom Ustanove.

## **Član 18.** **(Statut)**

- (1) Osnovni opći akt Ustanove je Statut, a može imati i druge opće akte u skladu sa zakonom i Statutom.

(2) Statut Ustanove sadrži odredbe o: nazivu i sjedištu ustanove i poslovnih jedinica (ako budu osnovane), obavezama ustanove prema Osnivaču, djelatnosti ustanove i o načinu i uslovima obavljanja te djelatnosti, odnosu prema korisnicima usluga, statusnim promjenama, načinu raspoređivanja sredstava za rad, imenovanju i razrješavanju direktora, drugim organima ustanove i njihovim pravima, obavezama i odgovornostima, uslovima i načinu njihovog izbora i razrješenja, općim aktima koji se donose u ustanovi i načinu njihovog donošenja, načinu ostvarivanja javnosti rada i saradnje sa srodnim i interesnim udruženjima građana, i druge odredbe od značaja za rad Ustanove i za ostvarivanje prava, obaveza i odgovornosti zaposlenika ustanove.

## **DIO SEDMI – PRIJELAZNE I ZAVRŠNE ODREDBE**

### **Član 19. (Privremeno imenovanje upravnog odbora i direktora)**

Vlada Kantona će u roku od 15 (petnaest) dana od dana stupanja na snagu ove odluke imenovati upravni odbor i vršioca dužnosti direktora Ustanove, na kraći period utvrđen zakonom a najduže do konačnog imenovanja na ove pozicije, te donijeti privremeni Statut s ciljem izvršenja propisane procedure upisa subjekta u sudski registar.

### **Član 20. (Donošenje Statuta)**

Upravni odbor iz člana 18. ove odluke će u roku od 30 (trideset) dana od dana donošenja Rješenja o registraciji od strane nadležnog suda donijeti Statut Ustanove i podnijeti Vladi na saglasnost.

### **Član 21. (Upis u sudski registar)**

Vršilac dužnosti direktora Ustanove dužan je preduzeti sve potrebne radnje za upis Ustanove u sudski registar.

### **Član 22. (Stupanje na snagu)**

Odluka stupa na snagu narednog dana od dana objavljivanja u “Službenim novinama Zeničko-dobojskog kantona”.

Broj: \_\_\_\_\_/14  
Datum, \_\_\_ maj 2014. godine  
Z e n i c a

**PREDSJEDAVAJUĆI**

Sretko Radišić s.r.

# **Obrazloženje**

## **PRIJEDLOGA ODLUKE O OSNIVANJU JAVNE USTANOVE CENTAR ZA DJECU I ODRASLE OSOBE S POSEBNIM POTREBAMA ZENIČKO-DOBOJSKOG KANTONA**

### **I PRAVNI OSNOV**

Ustavni osnov za donošenje ove odluke sadržan je u odredbama člana 37. stav (1) tačka f) Ustava Zeničko-dobojskog kantona, kojim je propisano da Skupština donosi zakone i ostale propise za izvršavanje kantonalnih nadležnosti.

Pravni osnov za donošenje Odluke osnivanju Javnu ustanovu Centar za djecu i odrasle osobe s posebnim potrebama Zeničko-dobojskog kantona (u daljem tekstu: Odluka) sadržan je u odredbama člana 1., 5. i 6. Zakona o ustanovama („Sl. list R BiH“ broj: 6/92, 8/93 i 13/94) Navedenim zakonskim odredbama je propisano da se ustanova osniva za obavljanje djelatnosti socijalne zaštite i drugih djelatnosti u skladu sa zakonom, kao i uslovi za osnivanje i početak rada ustanove. Također pravni osnov za donošenje Odluke sadržan je u odredbi člana 73. stav (5) tačka b) alineja 3) i tačka e) Zakona o socijalnoj zaštiti, zaštiti civilnih žrtava rata i zaštiti porodice sa djecom („Sl. novine Zeničko-dobojskog kantona“, br. 13/07 i 13/11), koji govori o mogućnosti pružanja usluga kojima se u cjelini ili djelimično zadovoljavaju socijalne i druge potrebe djeci ometenoj u fizičkom ili psihičkom razvoju – djeci sa posebnim potrebama, kao i dnevni boravak korisnika socijalne zaštite na način da se osnuje ustanova socijalne zaštite.

### **II RAZLOZI ZA DONOŠENJE**

Vlada Zeničko – dobojskog kantona je uputila Skupštini Zeničko-dobojskog kantona na razmatranje Prijedlog Odluke o osnivanju Javne ustanove Centar za djecu i odrasle osobe sa posebnim potrebama Zeničko-dobojskog kantona. Skupština je na 54. sjednici, dana 13.03.2014. godine odlučila da se Odluka o osnivanju Javne ustanove Centar za djecu i odrasle osobe s posebnim potrebama Zeničko-dobojskog kantona razmatra u formi Nacrta i da se o istoj provede javna rasprava. Na istoj sjednici, Zaključkom Skupštine broj: 01-35-5051-1/14, prihvaćen je Nacrt Odluke i upućen u javnu raspravu u općine Zeničko-dobojskog kantona, za što je određen i vremenski rok u trajanju od mjesec dana. Svrha javne rasprave bila je pribaviti mišljenje građana, zainteresiranih organizacija civilnog društva, stručnih i drugih organa o predmetu javne rasprave. Skupština Zeničko-dobojskog kantona je istim Zaključkom zadužila Vladu Kantona da prilikom izrade Prijedloga Odluke o osnivanju Javne ustanove Centar za djecu i odrasle osobe s posebnim potrebama Zeničko-dobojskog kantona, uzme u obzir prijedloge, stavove i sugestije radnih tijela, te poslanika iznesene u raspravi na sjednici Skupštine, kao i one istaknute u toku javne rasprave ili podnesene od strane pojedinaca, udruženja i drugih učesnika u raspravi i da o tome podnese izvještaj Skupštini.

Ministar Ministarstva donio je Plan provođenja Javne rasprave u dvanaest općina Kantona broj: 09-35-5051-1/14 od 27.03.2014. godine. O provedenoj Javnoj raspravi sačinjen je Izvještaj, koji čini sastavni dio ovog obrazloženja.

S ciljem sistemskog uređenja obavljanja djelatnosti socijalne, odgojno-obrazovne i zdravstvene zaštite za djecu i odrasle osobe s posebnim potrebama neophodno je osnivati kantonalnu javnu ustanovu.

Da bi se Javna ustanova osnovala potrebno je u skladu sa Zakonom o ustanovama („Službeni list R BiH“, broj: 6/92, 8/93 i 13/94) provesti propisanu proceduru tj. obezbijediti uslove za osnivanje i početak rada ustanove što podrazumijeva i donošenje osnivačkog akta od strane Skupštine Zeničko-dobojskog kantona.

### **III OBJAŠNENJE PREDLOŽENIH PRAVNIH RJEŠENJA U ODNOSU NA NACRT ODLUKE**

Nakon provedene Javne rasprave i uvažanih prijedloga i sugestija ugrađenih u prijedlog Odluke u daljem tekstu dajemo objašnjenje kako slijedi:

U članu 5. (Pravni status) stav (4) prihvaćena je primjedba Općine Kakanj, Predstavnik Udruženja roditelja djece i odraslih s posebnim potrebama Tešanj, te su brisane riječi: „i Udruženja Humanost-societas humanitatis Zenica“, tako da navedeni stav glasi: “Odluku o osnivanju poslovnih jedinica Centra donosi Upravni odbor Ustanove uz saglasnost Vlade Zeničko-dobojskog kantona”.

U članu 8. (Ciljevi i zadaci) prihvaćen je prijedlog Općine Kakanj, i izvršena je dopuna člana sa novom alinejom jedan koja glasi: „rano podsticanje razvoja i rana intervencija za djecu s posebnim potrebama predškolskog uzrasta“.

Ministarstvo je nakon Javnih rasprava i razmatranja Nacrta teksta Odluke u alineji dva istog člana na kraju teksta izvršilo zamjenu riječi „nastavnom“ sa riječju „individualnom“, tako da sad navedena alineja glasi: „odgojno-obrazovni rad sa djecom i odraslim osobama s posebnim potrebama sa područja općina Zeničko–dobojskog kantona, s ciljem izgradnje ličnog identiteta, socijalne integracije, izgradnje kompetencija od životnog značaja, pripreme za život, a prema prilagođenom individualnom planu i programu,

Isti član dopunjen je novom alinejom šest koja glasi: „program podrške porodici kroz neposredni savjetodavni i edukacijski stručni rad.“

S obzirom da djelatnost Ustanove podrazumjeva i rano podsticanje razvoja i rana intervencija za djecu s posebnim potrebama predškolskog uzrasta, a i pružanje podrške porodici kroz neposredni savjetodavni i edukacijski stručni rad, izvršene su navedene dopune.

U članu 11. u stavu (2) (Odgovornost za obaveze) na prijedlog Općine Visoko ispred riječi „imovina“ dodane su riječi „sredstvima i“, te isti glasi: „Za preuzete obaveze u pravnom prometu Centar odgovara sredstvima i imovinom kojim raspolaže.“ Na predloženi način odgovornost Ustanove za preuzete obaveze tačno je precizirana, i ne uračunavaju se nekretnine – zgrade u imovinu Ustanove koje su vlasništvo općina Zenica, Visoko i Maglaj.

U članu 14. (Upravljanje) stav (2) djelimično je uvažan prijedlog Općine Kakanj, Općine Zenica, gđe Sandre Planinčić, Udruženja „Sunce“ Maglaj, te stav sada glasi: „Upravni odbor ima pet članova, koji se biraju sa liste prijavljenih kandidata na javni oglas i čine ga predstavnici osnivača – dva člana, zaposlenik Ustanove - jedan član, zaposlenik JU Centra za socijalni rad/nadležne općinske službe za socijalnu zaštitu sa područja Zeničko – dobojskog kantona - jedan član, te predstavnik iz reda roditelja/staratelja djece ili odraslih osoba s posebnim potrebama – jedan član.

Na predloženi način otvorena je mogućnost da u sastavu Upravnog odbora bude zastupljen predstavnik centara za socijalni rad/nadležne općinske službe za socijalnu zaštitu sa područja Zeničko – dobojskog kantona i jedan član iz reda roditelja.

U stavu (3) istog člana prihvaćen je prijedlog Općine Zenica da se ograniči broj imenovanja na pozicije u Upravnom odboru, te ista sada glasi: „Predsjednika i članove upravnog odbora imenuje Vlada Zeničko-dobojskog kantona (u daljem tekstu: Vlada) na period od četiri (4) godine i mogu biti imenovani najviše dva puta uzastopno.

Član 15. (Djelokrug rada Upravnog odbora) dopunjen je na način da Upravni odbor donosi opći akt o unutrašnjoj organizaciji i sistematizaciji poslova uz saglasnost Vlade, s obzirom da se rad Ustanove finansira i iz budžeta Kantona.

U članu 17. stav (3) (Rukovođenje) prihvaćen je prijedlog Općine Zenica, da se direktoru ustanove ograniči broj mandata na dva uzastopna, te sada isti glasi: „Direktora Centra imenuje Upravni odbor na osnovu javnog konkursa, uz saglasnost Vlade na period od četiri (4) godine i može biti imenovan najviše dva puta uzastopno.“



Član 18. (Statut) dopunjen je u stavu (2) tako da su pred kraj teksta dodate riječi „saradnje sa interesnim udruženjima građana“.

Naime, prijedlog Općine Zenica je da je potrebno jasno definisati ulogu i relaciju sa udruženjima. Stav predlagača jeste da je organizovano djelovanje roditelja djece i odraslih osoba s posebnim potrebama od krucijalnog značaja za oblast društvene zaštite, odnosno socijalne i zdravstvene zaštite i obrazovanje ove kategorije. Udruženja građana roditelja djece i odraslih osoba s posebnim potrebama, odnosno organizacije civilnog društva, svojim djelovanjem dopunjuju, nažalost, prisutne sistemске nedostatke brige i usluga za ovu kategoriju građana (realizacijom projekata usmjerenih na: rješavanje problematike sa kojom se sučavaju djeca i odrasle osobe s posebnim potrebama i njihove porodice, lobiranje, javno zagovaranje, edukacije i dr.). Interesna udruženja imaju direktan uvid i informacije o potrebama i statusu djece i odraslih osoba s posebnim potrebama u lokalnim zajednicama što je korisno za razvoj postojećih i uvođenje novih usluga Ustanove, zbog čega će Statutom Ustanove biti uređen i način ostvarivanja saradnje sa interesnim udruženjima građana.

#### IV FINANSIJSKA SREDSTVA ZA SPROVOĐENJE ZAKONA

Za provođenje ove Odluke potrebna su finansijska sredstva u visini od 49.250,00KM (četrdesetdevethiljada dvjestopedeset KM), za uplatu osnovnog kapitala javne ustanove, a koja je planirana u Budžeta Zeničko-dobojskog kantona za 2014. godinu, na poziciji Ostala osnivačka ulaganja u ovom Ministarstvu.

Napominjemo da u skladu sa članom 9. Odluke, sredstva za rad Ustanove obezbjeđuju se iz budžeta Osnivača, po osnovu ugovora o učešću korisnika u pokriću dijela ili ukupnih troškova usluga Ustanove, te drugih izvora.

U dosadašnjoj praksi, Ministarstvo i općine Zeničko-dobojskog kantona finansiranje usluga ranog podsticanja razvoja, rane intervencije i dnevnog zbrinjavanja djece i odraslih osoba s posebnim potrebama su vršile po principu solidarnosti. S tim u vezi, i dalje je planirano izdvajanje sredstva iz Budžeta Kantona u visini 2/3 ukupno potrebnih sredstava, dok će se učešće općina Zeničko-dobojskog kantona ogledati u sufinansiranju 1/3 sredstava ukupno potrebnih sredstava za djelovanje Ustanove a po principu procentualnog broja stanovnika na području Kantona. Podršku stavu predlagača u ovakvom načinu finansiranja su iskazale većina općina tokom javne rasprave, dok su općine Usora, Zenica i Zavidovići ovaj stav i pismeno potvrdile. U budućem periodu, planirano je da se kroz izmjene i dopune Zakona o socijalnoj zaštiti, zaštiti civilnih žrtava rata i zaštiti porodice sa djecom Zeničko-dobojskog kantona, definiše finansiranje usluga Ustanove.

Ministarstvo finansija je aktom broj: 07/2-35-1761-2/14 od 12.05.2014. godine dalo mišljenje da nema primjedbi na Odluku, s tim da ovo Ministarstvo kroz uštede, unutrašnje preraspodjele sredstava unutar pozicija Ministarstva, preraspodjelom sredstava sa pozicija drugih budžetskih korisnika uz njihovu saglasnost, obezbjeđenje po osnovu ugovora sa općinama, te drugih izvora, obezbjeđuje nedostajuća sredstva za rad ustanove.

U Zenici, maj 2014. godine

**Ministarstvo za rad,  
socijalnu politiku i izbjeglice  
MINISTAR**

---

**Ivica Ćurić**